



Broj/Број: 01,02-50-1-18-10/08  
Sarajevo/Сарајево, 30.7.2008. godine

## ZAPISNIK

### 10. zajedničke sjednice oba doma Parlamentarne skupštine BiH, održane 30.7.2008. godine, s početkom u 11,15 sati

**Prisutni članovi Parlamentarne skupštine BiH:** 37 poslanika iz Predstavničkog doma i 13 delegata iz Doma naroda.

**Opravdano odsutni poslanici iz Predstavničkog doma:** Husein Nanić, Vinko Zorić, Snježana Rajilić, Mirko Okolić i Hadži Jovan Mitrović.

**Opravdano odsutni delegati iz Doma naroda:** Sulejman Tihić i Alma Čolo.

**Prisutni članovi Vijeća ministara BiH:** Nikola Špirić, predsjedavajući Vijeća ministara BiH, Tarik Sadović, ministar sigurnosti BiH, Dragan Vrankić, ministar finansija i trezora BiH, Bariša Čolak, ministar pravde BiH, Sredoje Nović, ministar civilnih poslova BiH, Sven Alkalaj, ministar vanjskih poslova BiH, Božo Ljubić, ministar komunikacija i prometa BiH, Marina Pendeš, zamjenik ministra odbrane BiH, Vilim Primorac, zamjenik ministar vanjske trgovine i ekonomskih odnosa BiH, Srđan Arnaut, zamjenik ministra pravde BiH, Osman Topčagić, direktor Direkcije za evropske integracije BiH.

**Ostali prisutni:** Marinko Čavara, zamjenik predsjedavajućeg Predstavničkog doma Parlamenta Federacije BiH, Vesna Saradžić, zamjenica predsjedavajućeg Predstavničkog doma Parlamenta Federacije BiH, Spomenka Mičić, potpredsjednica Federacije BiH, predstavnici međunarodnih organizacija u Bosni i Hercegovini – OHR-a, OSCE-a, EUSR-a, DFID-a, predstavnici nevladinih organizacija CCI-a i NDI-a, predstavnici Ambasade SAD-a.

Sjednicu je otvorio i njome predsjedavao Mladen Ivanić, predsjedavajući Doma naroda Parlamentarne skupštine BiH.

Predsjedavajući sjednicom konstatirao je da je Zajednički kolegij oba doma, u skladu s članom 88. Poslovnika Doma naroda i članom 95. Poslovnika Predstavničkog doma, utvrdio sljedeći

## DNEVNI RED

1. Presentacija sadržaja Sporazuma o stabilizaciji i pridruživanju (SSP) od Direkcije za evropske integracije BiH, te aktivnosti Vijeća ministara BiH na realizaciji obaveza Bosne i Hercegovine u vezi s provođenjem SSP-a.

U raspravi o dnevnom redu učestvovao je Zlatko Lagumdžija, koji je predložio da se dnevni red dopuni s još jednom tačkom u okviru koje bi se raspravljalo o odluci o povećanju plaća. Mladen Ivanić podsjetio je da je,

u skladu s poslovničkim odredbama, dnevni red zajedničke sjednice oba doma utvrdio Zajednički kolegij oba doma, ističući da se predložena tačka dnevnog reda može delegirati na redovnim sjednicama Doma naroda i Predstavničkog doma Parlamentarne skupštine BiH.

#### **Ad. 1. Presentacija sadržaja Sporazuma o stabilizaciji i pridruživanju (SSP) od Direkcije za evropske integracije BiH, te aktivnosti Vijeća ministara BiH na realizaciji obaveza Bosne i Hercegovine u vezi s provođenjem SSP-a**

U okviru ove tačke dnevnog reda, Mladen Ivanić podsjetio je prisutne da je u pozivu za sjednicu konstatirano da će Sporazum o stabilizaciji i pridruživanju između Evropskih zajednica i njihovih država članica i Bosne i Hercegovine biti dostavljen na parlamentarnu e-mail adresu poslanika i delegata, te da je Privremeni sporazum o trgovini i trgovinskim pitanjima između Evropske zajednice i Bosne i Hercegovine objavljen u "Službenom glasniku BiH – međunarodni ugovori", br. 5/08.

Nakon uvodnih napomena, Mladen Ivanić pozvao je Nikolu Špirića da se obrati članovima Parlamentarne skupštine BiH.

**Nikola Špirić** je u svom izlaganju istakao da je Vijeće ministara BiH u junu 2008. godine održalo tematsku sjednicu na kojoj je analizirano 30 prioriteta pitanja koje je dostavila Evropska komisija i koja će predstavljati osnov za izvještaj o napretku Bosne i Hercegovine u 2008. godini. Istakao je da će se ovakve tematske sjednice o evropskim integracijama Vijeće ministara BiH održavati jednom mjesečno u okviru kojih će se analizirati provođenje sporazuma i ispunjavanje ostalih uslova u vezi s daljnjom integracijom.

U nastavku izlaganja Nikola Špirić izložio je 30 prioriteta i aktivnosti koje je Vijeće ministara BiH preduzelo na njihovoj realizaciji, kako slijedi:

- **Prioritet 1. - odnosi se na usvajanje sveobuhvatnog Akcionog plana za realizaciju prioriteta iz evropskog partnerstva.** Vijeće ministara BiH je, 30. marta 2008., usvojilo Metodologiju izrade Programa integriranja, a Direkcija za evropske integracije BiH je u tu svrhu organizirala četiri obuke za predstavnike institucija Bosne i Hercegovine. Također, Vijeće ministara BiH usvojilo je Akcioni plan za provođenje Sporazuma o stabilizaciji i pridruživanju.
- **Prioritet 2. - osiguranje pune operativnosti Fonda za reformu javne uprave.** Prioritet je ispunjen u smislu da je Fond postao operativan nakon usvajanja Pravilnika o radu Upravnog odbora Fonda.
- **Prioritet 3. – imenovanje ombudsmena Bosne i Hercegovine.** Kako je ovaj prioritet u nadležnosti Parlamentarne skupštine BiH, predsjedavajući Vijeća ministara BiH pozvao je članove Parlamentarne skupštine BiH da ulože dodatni napor s ciljem što bržeg rješavanja ovog pitanja.
- **Prioritet 4. – usvajanje zakona i odluke o pitanjima državne imovine.** Komisija za državnu imovinu nastavit će raditi i uložiti napore da dođe do prihvatljivog rješenja, pri čemu su kriteriji za raspodjelu većinom usaglašeni.
- **Prioritet 5. – očuvanje nezavisne pozicije regulatora, naročito finansijke nezavisnosti.** Vijeće ministara BiH obavezalo je Direkciju za evropske integracije BiH da pripremi informaciju na koje regulatore se ovaj prioritet odnosi, te šta sve podrazumijeva nezavisnost ovih institucija.

- **Prioritet 6. – usvajanje Nacionalne strategije za reformu pravosuđa i Nacionalne strategije za pitanje ratnih zločina.** Vijeće ministara BiH je, na 23. juna 2008., usvojilo Nacionalnu strategiju za reformu pravosuđa, a nacrt druge strategije je u fazi izrade.
- **Prioritet 7. – usvajanje Revidirane strategije integriranog upravljanja granicom i akcioni plan s jasno definiranim nadležnostima kada je u pitanju upravljanje granicom.** Vijeće ministara BiH je, 10. jula 2008., usvojilo strategiju i akcioni plan čime je ovaj prioritet ispunjen.
- **Prioritet 8. – usvajanje inovirane Nacionalne strategije borbe protiv organiziranog kriminala i trgovine ljudima i potrebnih akcionih planova.** Usvojena je Strategija za borbu protiv trgovine ljudima za period 2008.-2012. godine, a za svaku godinu se posebno donosi operativni plan. Strategija protiv organiziranog kriminala i korupcije 2006.-2009. godine usvojena je zajedno s Akcionim planom, pri čemu je provođenje Strategije za borbu protiv organiziranog kriminala u toku, dok za provođenje Strategije za borbu protiv korupcije nije osnovana radna grupa. Ministarstvo sigurnost BiH izradilo je prijedlog odluke o osnivanju ove radne grupe.
- **Prioritet 9. – usvajanje Akcionog plana za Nacionalnu strategiju za borbu protiv korupcije.** Ministarstvo pravde BiH i Ministarstvo sigurnosti BiH zaduženi su da riješe pitanje izrade ove strategije.
- **Prioritet 10. – usvajanje Zakona o zaštiti ličnih podataka i uspostavljanje agencije.** Zakon o zaštiti ličnih podataka je usvojen. Odluka o početku rada Agencije donesena je u decembru 2007. godine, a direktor Agencije imenovan 3. juna 2008. Dakle, prioritet je ispunjen.
- **Prioritet 11. – ratifikacija revidirane Socijalne povelje.** Ratifikacija izvršena na 42. sjednici Predsjedništva BiH, održanoj 16. juna 2008., čime je i ovaj prioritet ispunjen.
- **Prioritet 12. – izmjena Ustava Republike Srpske u smislu uklanjanja odredbe o smrtnoj kazni.** Narodna skupština Republike Srpske, 19. marta 2008., usvojila je Nacrt amandmana na Ustav RS-a kojim se ukida smrtna kazna, pa će i ovaj prioritet uskoro biti ispunjen.
- **Prioritet 13. – izmjene izbornog zakonodavstva s ciljem potpunog usklađivanja s Evropskom konvencijom o zaštiti ljudskih prava i osnovnih sloboda.** Pitanje je najviše usmjereno ka načinu izbora članova Predsjedništva BiH i delegata u Domu naroda Parlamentarne skupštine BiH, a kako je taj izbor reguliran Ustavom BiH, ne postoji mehanizam za ispunjenje ovog prioriteta prije provođenja ustavnih reformi.
- **Prioritet 14. – ratifikacija Evropske okvirne konvencije o prekograničnoj saradnji.** Prioritet je ispunjen, Bosna i Hercegovina je, 28. marta 2008., uručila instrument o ratifikaciji Okvirne konvencije.
- **Prioritet 15. – usvajanje Zakona o Fiskalnom vijeću, te uspostavljanje stalne formule za raspodjelu prihoda.** Usvajanjem Zakona o Fiskalnom vijeću i Odlukom Upravnog odbora Uprave za indirektno oporezivanje o stalnoj raspodjeli prihoda, ovaj prioritet je ispunjen.
- **Prioritet 16. – ukidanje odredbi u oblasti oporezivanja dobiti preduzeća koje nisu u saglasnosti s principima Kodeksa ponašanja oporezivanja preduzeća i osiguranje da sve nove poreske mjere budu u saglasnosti s ovim principima.** Ovo pitanje je u isključivoj nadležnosti entiteta, pa je Vijeće ministara BiH zadužilo Ministarstvo finansija i trezora BiH da obavi razgovore s entitetskim predstavnicima o ovom pitanju.
- **Prioritet 17. – uspostavljanje Ekonomsko-socijalnog vijeća.** Za realiziranje ovog prioriteta, s jedne strane, ne postoji politička saglasnost za formiranje ovog vijeća, a s druge strane, na nivou Bosne i Hercegovine ne postoji sindikat koji bi bio ugovorna strana kod formiranja Ekonomsko-socijalnog vijeća.
- **Prioritet 18. – ukidanje carinskih dažbina koje nisu u saglasnosti s GAT-om.** Prioritet je ispunjen od momenta primjene Privremenog sporazuma.

- **Prioritet 19. – usvajanje Zakona o obligacionim odnosima na državnom nivou.** Vijeće ministara BiH zadužilo je Ministarstvo pravde BiH da obavi neophodne razgovore u pogledu usaglašavanja spornih pitanja iz Zakona o obligacionim odnosima.
- **Prioritet 20. – usvajanje Zakona o superviziji banaka na državnom nivou.** Centralna banka BiH i entitetske agencije za bankarstvo potpisale su Memorandum o razumijevanju, što se smatra ispunjenjem ovog prioriteta.
- **Prioritet 21. – usvajanje Zakona o poljoprivredi i ruralnom razvoju.** Zakon je usvojen, čime je i prioritet ispunjen.
- **Prioritet 22. – usvajanje Zakona o lijekovima.** Zakon je usvojen, čime je i prioritet ispunjen.
- **Prioritet 23. – usvajanje Zakona o zaštiti okoliša i uspostavljanje Agencije za zaštitu okoliša BiH.** Osnovana je radna grupa za izradu zakona kojim će biti stvoreni uslovi za uspostavljanje agencije.
- **Prioritet 24. – usvajanje Strategije razvoja malih i srednjih preduzeća BiH i Zakona o malim i srednjim preduzećima.** Osnovana je radna grupa koja se bavi ovim pitanjima, ali u njenom radu postoje određeni problemi i nesporazumi.
- **Prioritet 25. – usvajanje Zakona o srednjem stručnom obrazovanju i obuci.** Zakon je usvojen, čime je i prioritet ispunjen.
- **Prioritet 26. – usvajanje Zakona o Javnom RTV servisu Federacije BiH i potpuno provođenje zakonodavstva u PBS-u.** Predstavnički dom Parlamenta Federacije BiH prihvatio je usaglašeni tekst Zakona o Javnom RTV sistemu.
- **Prioritet 27. – usvajanje sveobuhvatne Strategije energetskog sektora i završavanje Mape puta za sektor plina.** Formiran je ekspertni tim za izradu, koordinaciju i usaglašavanje zakonske regulative, ali zbog političkih nesporazuma, postoje određeni problemi u rješavanju ovog pitanja.
- **Prioritet 28. – usvajanje neophodnog zakonodavstva za provođenje popisa stanovništva 2011. godine.** Za ispunjenje ovog prioriteta trenutno ne postoji politički konsenzus.
- **Prioritet 29. – usvajanje zakonodavstva o državnoj pomoći.** Radna grupa Ministarstva vanjske trgovine i ekonomskih odnosa BiH izradila je nacrt zakona, ali postoji nekoliko pitanja koja nisu usaglašena.
- **Prioritet 30. – osiguranje pune operativnosti Uprave za zaštitu bilja.** Ispunjenje prioriteta je u završnoj fazi.

Nakon prezentacije 30 prioriteta, Nikola Špirić konstatirao je da je 2/3 prioriteta ispunjeno, a da se na ostalima intenzivno radi kako bi se ostvario napredak u izvještajnom periodu. U nastavku izlaganja posebno se osvrnuo na činjenicu da je Vijeće ministara BiH usvojilo Akcioni plan za provođenje obaveza iz Privremenog sporazuma, Akcioni plan za provođenje Sporazuma o stabilizaciji i pridruživanju, te Akcioni plan za liberalizaciju viznog režima.

**Osman Topčagić** u svojoj prezentaciji podsjetio je prisutne da je, 16. juna 2008., u Luksemburgu potpisan Sporazum o stabilizaciji i pridruživanju između Evropskih zajednica i njihovih država članica i Bosne i Hercegovine i Privremeni sporazum o trgovini i trgovinskim pitanjima između Evropske zajednice i Bosne i Hercegovine. Istakao je da Privremeni sporazum ima 58 članova koji su organizirani u četiri poglavlja, te da ima ograničen rok primjene, odnosno do stupanja na snagu Sporazuma o stabilizaciji i pridruživanju. Također, Privremeni sporazum, pored osnovnog teksta, ima i šest aneksa i šest protokola, koje je Topčagić u nastavku izlaganja ukratko pojasnio.

Nakon Privremenog sporazuma, prezentacija je bila usmjerena na Sporazum o stabilizaciji i pridruživanju u okviru koje je istaknuto da on ima 135 članova organiziranih u 10 poglavlja, uključujući i sedam aneksa, sedam protokola i izjave strana iz završnog akta. Ovaj dio

prezentacije obuhvatio je odredbe sporazuma koje se odnose na glavne političke i ekonomske teme.

Mladne Ivanić je, nakon izlaganja Osmana Topčćagića, upoznao prisutne da je Zajednički kolegij oba doma Parlamentarne skupštine BiH postigao dogovor i preporučuje da se zbog efikasnosti rada u raspravu uključe i stavove iznesu samo predsjedavajući klubova oba doma.

Prigovor protiv ovakvog prijedloga imao je Denis Bećirović, nakon čega je Mladen Ivanić, uz konsultaciju s članovima Zajedničkog kolegija oba doma, pozvao sve zainteresirane poslanike i delegate da se prijave za učešće u raspravi.

**U raspravi o ovoj tački dnevnog reda učestvovali su:** Zlatko Lagumdžija, Martin Raguž, Jerko Ivanković Lijanović, Branko Dokić, Bakir Izetbegović, Azra Hadžiahmetović, Milorad Živković, Denis Bećirović, Rifat Dolić, Mladen Ivanić, Niko Lozančić, Jozo Križanović, Halid Genjac, Sadik Bahtić, Sefer Halilović, Šefik Džaferović.

### **Rasprava o ovoj tački dnevnog reda odvijala se kako slijedi:**

- Zlatko Lagumdžija je, nakon svog izlaganja, predložio je sljedeće

#### ZAKLJUČKE

1. "Zadužuje se predsjedavajući Vijeća ministara BiH i ministar vanjskih poslova BiH da za zajedničku sjednicu oba doma, sa čelništvom Bosne i Hercegovine i entiteta, pripreme ekspoze o obavezama koje proističu iz Odluke Vijeća ministara Evropske unije, br. 2008/211/EC, od 18.2.2008., i plan njihove realizacije u roku od mjesec dana.
2. Predstavnički dom i Dom naroda usvajaju Odluku Vijeća ministara Evropske unije, br. 2008/211/EC, s listom principa, prioriteta i uslova sadržanih u evropskom partnerstvu sa BiH, te poziva Vijeće ministara Evropske unije, Evropsku komisiju i Vijeće za provođenje mira da dostavi Vijeću ministara BiH i Parlamentarnoj skupštini BiH zakone i odluke koje proizilaze iz navedenih dokumenata Vijeća ministara Evropske unije, prema utvrđenoj dinamici.  
Predstavnički dom i Dom naroda obavezuju se da će usvojiti pripremljene zakone i ustavne promjene u predviđenoj formi u roku od mjesec dana od dostavljanja dokumenata, ako se u Parlamentarnoj skupštini BiH ne usaglase kvalitetnija rješenja.
3. Predstavnički dom i Dom naroda pozivaju Vijeće ministara BiH, Predsjedništvo BiH i entitetske institucije da, u okviru svojih nadležnosti, donesu sve odluke koje proizilaze iz Odluke Vijeća ministara Evropske unije, br. 2008/211/EC, uključujući i one o prijenosu nadležnosti ili ustavnim reformama potrebnim za realizaciju evropskog partnerstva sa BiH.
4. Zadužuje se Vijeće ministara BiH da obavezno jednom u šest mjeseci podnese izvještaj o realizaciji Odluke, br. 2008/211/EC, s ažuriranim planom realizacije.
5. Parlamentarna skupština BiH poziva Evropsku zajednicu da Bosni i Hercegovini, Crnoj Gori, Srbiji i Albaniji do kraja godine dodijeli status kandidata i otvori pregovore o članstvu kako bi se pospiješile daljnje reformske aktivnosti i regionalna saradnja te ubrzao put zemalja Jugoistočne Evrope ka članstvu u Evropskoj uniji.
6. Poništava se odluka parlamentarne komisije oba doma o povećanju primanja poslanika i delegata."

Nakon izlaganja Zlatka Lagumdžije korekciju citata (repliku) imao je Ivo Miro Jović.

- **Martin Raguž** je, u okviru ove tačke dnevnog reda, predložio sljedeći

#### ZAKLJUČAK

"Parlamentarna skupština BiH zadužuje Vijeće ministara BiH da, u roku od 60 dana, u pisanoj formi pripremi preciznu dinamiku primjene Sporazuma o stabilizaciji i pridruživanju sa jasnom vizijom i određenjem kada je realno da BiH podnese zahtjev za dobivanje statusa kandidata, kada možemo očekivati status kandidata, te koje institucionalne pretpostavke treba stvoriti da se ovi prioriteta realiziraju."

- **Jerko Ivanković Lijanović** posebno se osvrnuo na prijelazni period od pet godina za veliki dio proizvoda Bosne i Hercegovine, kao bi proizvodnja bila osposobljena i postala konkurentna, a koji je Privremenim sporazumom o trgovini i trgovinskim pitanjima između Evropske zajednice i Bosne i Hercegovine odobren Bosni i Hercegovini. Nakon izlaganja, Jerko Ivanković Lijanović predložio je sljedeći

#### ZAKLJUČAK

"Zadužuje se Vijeće ministara BiH da, u roku od 30 dana, osigura primjenu Sporazuma CEFTA u oblasti zaštitnih mjera, te da ih uskladi s Privremenim sporazumom o stabilizaciji i pridruživanju."

- **Branko Dokić** je, nakon svog izlaganja, predložio sljedeće

#### ZAKLJUČKE

1. "Predstavnički dom Parlamentarne skupštine BiH će do kraja septembra 2008. godine usvojiti akcioni plan svojih obaveza u vezi s provođenjem Sporazuma o stabilizaciji i pridruživanju.
  2. S ciljem efikasnijeg rada i korištenja raspoloživih kadrova, oba doma promijenit će svoje poslovne tako da sve posebne komisije prerastu u zajedničke komisije oba doma.
  3. Parlamentarna skupština BiH pokrenut će inicijativu da četiri zemlje Zapadnog Balkana, koje su potpisale SPP, formiraju zajedničko parlamentarno tijelo za pregovore i pokretanje inicijative da BiH, Srbija, Crna Gora i Albanija dobiju status kandidata u toku 2009. godine."
- **Bakir Izetbegović** je, u okviru ove tačke dnevnog reda, u ime Kluba poslanika SDA, predložio sljedeći

#### ZAKLJUČAK

"Zadužuje se Vijeće ministara BiH da, u roku od 45 dana, Parlamentarnoj skupštini BiH predloži na usvajanje Akcioni plan realizacije obaveza Bosne i Hercegovine u provođenju Sporazuma o stabilizaciji i pridruživanju. Akcionim planom treba detaljno razraditi i specificirati potrebne aktivnosti, posebno zakonodavne, nosioce aktivnosti i rokove za njihovo izvršenje. Vijeće ministara BiH može odrediti i značajne stimulativne mjere za nosioce aktivnosti ukoliko se one budu odvijale u skladu s rokovima iz Akcionog plana. Vijeće ministara BiH podnosilo bi kvartalno Parlamentarnoj skupštini BiH izvještaj o realizaciji Akcionog plana."

- **Azra Hadžiahmetović** konstatirala je da su ključni izazovi pred Bosnom i Hercegovinom vezani za političku volju. S ciljem što bržeg kretanja Bosne i Hercegovine na evropskom putu, neophodno je uvesti nova pravila ponašanja i u Parlamentarnoj skupštini BiH i u drugim institucijama kako bi se što prije ispunjavale obaveze koje su pred Bosnom i Hercegovinom. Posebno je skrenula pažnju na efikasnost sistema, odnosno činjenicu da je upitno da li postoji institucionalizirani sistem odgovornosti za učinjeno, propušteno da se učini i neučinjeno na evropskom putu, pa je s tim u vezi neophodno da Parlamentarna skupština BiH, Vijeće ministara BiH i ostale institucije, na kojima je teret evropskog puta, učine sve u stvaranju takvog sistema odgovornosti.
- **Milorad Živković** osvrnuo se na činjenicu da je podrška EU integracijama istvoremeno i podrška Bosni i Hercegovini, ali je ona, prema njegovom mišljenju, do sada bila neiskrena i deklarativna, što je u nastavku izlaganja i obrazložio. Također, naglasio je da je problem u Bosni i Hercegovini nepostojanje tolerantnog dijaloga, te da Bosna i Hercegovina nema ni ljudskih ni institucionalnih kapaciteta za provođenje Akcionog plana Vijeća ministara BiH.
- **Denis Bećirović** istakao je da obaveza provođenja Sporazuma o stabilizaciji i pridruživanju podrazumijeva i novu političku zrelost i odgovornost, te novi način rada i u Parlamentarnoj skupštini BiH i u Vijeću ministara BiH. Podsjetio je da je Parlamentarna skupština BiH obavezala Vijeće ministara BiH da usvoji plan za provođenje Sporazuma o stabilizaciji i pridruživanju, i to u periodu između parafiranja i potpisivanja Sporazuma, a što nije učinjeno. Posebno pitanje, koje je jedno od ključnih pitanja i za druge zemlje koje teže da postanu punopravne članice EU, jeste pitanje borbe protiv korupcije, navodeći da Vijeće ministara BiH nije realiziralo ni zaključak Parlamentarne skupštine BiH u vezi sa izradom državne strategije za borbu protiv korupcije.

Nakon izlaganja, Denis Bećirović predložio je sljedeći

#### ZAKLJUČAK

1. "Predstavnički dom i Dom naroda zadužuje Vijeće ministara BiH da najkasnije u roku od 40 dana dostavi na razmatranje Parlamentarnoj skupštini BiH Akcioni plan za provođenje Sporazuma o stabilizaciji i pridruživanju koji će:
    - sadržavati mjere potrebne za provođenje Sporazuma o stabilizaciji i pridruživanju;
    - precizirati nadležne organe i institucije koji će te mjere usvajati i primjenjivati;
    - naglasiti odgovornost za njihovo usvajanje i primjenu;
    - odrediti vremenske rokove u kojem se one moraju donijeti i primjenjivati."
- **Rifat Dolić** istakao je da postoji problem u političkom ambijentu u Bosni i Hercegovini u pogledu postojanja konsenzusa kako unutar parlamentarne većine, tako i unutar svih političkih faktora za izvršavanje preuzetih obaveza na evropskom putu Bosne i Hercegovine. Posebno je naglasio da se na ovom putu ne smiju u drugi plan staviti ekonomija zemlje, socijalna sigurnost građana i drugi prioriteti u funkcioniranju Bosne i Hercegovine.
  - **Mladen Ivanić** je naveo da Vijeće ministara BiH u oblasti ekonomije mora pripremiti strategiju odgovora na izazove pred kojima će se Bosna i Hercegovina naći, posebno u oblasti poljoprivredne proizvodnje koja bez zaštitnih mehanizama neće izdržati uvoz sa tržišta EU koje je subvencionirano.
  - **Niko Lozančić** istakao je da je Sporazum o stabilizaciji i pridruživanju međunarodni ugovor koji podrazumijeva i prava i obaveze koje se moraju ozbiljno i odgovorno ispunjavati, pri čemu nije dovoljna samo deklarativna opredjeljenost za evropski put Bosne

i Hercegovine već snažna podrška zakonima i odlukama koje znače ispunjenje obaveza iz evropskog puta.

Nakon izlaganja Nike Lozančića, korekciju citata (repliku) imao je Salko Sokolović na izlaganje Milorada Živkovića.

- **Jozo Križanović** izrazio je podršku zaključcima podnesenim na sjednici koji su usmjereni ka razradi konkretnog akcionog plana koji će biti instrument za praćenje provođenja odredbi Sporazuma o stabilizaciji i pridruživanju.
- **Halid Genjac** podsjetio je na značaj Evropskog partnerstva s Bosnom i Hercegovinom, posebno navodeći da se u preambuli Sporazuma o stabilizaciji i pridruživanju navodi da se polazi od partnerstva, zatim da će Vijeće za Sporazum o stabilizaciji i pridruživanju pri ocjenjivanju napretka polaziti od kriterija iz partnerstva i izvještaja o partnerstvu, te da će se sredstva pomoći usmjeravati na osnovu ispunjenosti kriterija i prioriteta iz Evropskog partnerstva. Predsjedavajućem Vijeća ministara BiH Halid Genjac postavio je sljedeća pitanja: da li se odustalo od partnerstva, odnosno kada će biti izrađen akcioni plan za partnerstvo? Kada će se staviti u funkciju jedinice za evropske integracije pri institucijama, koji je plan i u kojem vremenu da se to uradi? Da li je Vijeće ministara BiH razmišljalo o programu obuke kadrova za potrebe usklađivanja našeg s evropskim zakonodavstvom, da li je šta učinjeno, ko vrši tu obuku i kako će se taj proces provoditi?
- **Sadik Bahtić** posebno je naglasio značaj potpisivanja Sporazuma o stabilizaciji i pridruživanju s ekonomskog aspekta, naročito u segmentu smanjenja carina.

Nakon izlaganja Sadika Bahtića, korekciju citata (repliku) imali su: Selim Bešlić, Denis Bećirović, Sadik Bahtić.

Denis Bećirović je, nakon iznesene replike Sadika Bahtića, zbog neprimjerenog rječnika, u ime kluba SDP-a, zatražio pauzu od 30 minuta, uz zahtjev da se Zajednički kolegij oba doma odredi prema iznesenim stavovima Sadika Bahtića.

Na molbu Mladena Ivanića, u 15.30 sati data je pauza od 15 minuta.

Sjednica je nastavljena u 16 sati.

Mladen Ivanić je u nastavku sjednice podsjetio prisutne da je, na zahtjev Kluba poslanika SDP-a, određena pauza, te je pozvao Jozu Križanovića, predsjedavajućeg Kluba, da obrazloži zahtjev, što je on i učinio.

Također, Mladen Ivanić naglasio je da se Zajednički kolegij oba doma u pauzi upoznao o upotrijebljenom rječniku u međusobnoj komunikaciji između dva poslanika, i u vezi s tim pozvao je članove Parlamentarne skupštine BiH da vode računa o načinu međusobne komunikacije, nakon čega je najavio izlaganje Sefera Halilovića.

- **Sefer Halilović** istakao je da evropski put Bosne i Hercegovine nema alternativu, ali da, prema upozorenjima iz Brisela i Evropske unije, politička i pravna nesigurnost u zemlji usporavaju taj evropski put i građane Bosne i Hercegovine dovodi u težak položaj. U nastavku izlaganja iznio je mišljenje o faktorima koji usporavaju taj evropski put Bosne i Hercegovine, posebno naglašavajući značaj medija i informiranosti javnosti o aktivnostima i radu Parlamentarne skupštine BiH. Nakon rasprave, Sefer Halilović predložio je sljedeći



## ZAKLJUČAK

"Obavezuje se Kolegij oba doma Parlamentarne skupštine BiH da osigura direktan tv prijenos sjednica Parlamentarne skupštine BiH i Doma naroda."

- **Šefik Džaferović** podsjetio je da o evropskim pitanjima u Parlamentarnoj skupštini BiH ne smije biti podjela na poziciju i opoziciju, jer je to pitanje od zajedničkog interesa za sve. Vijeće ministara BiH, prema njegovom mišljenju, treba biti nosilac evropskih integracija i provođenja Privremenog sporazuma, odnosno Sporazuma o stabilizaciji i pridruživanju. Suštinsko pitanje za provođenje Sporazuma o stabilizaciji i pridruživanju je odnos Bosne i Hercegovine prema obavezama koje proizilaze iz Sporazuma, pri čemu je neophodno uključiti evropske standarde u ispunjavanju tih obaveza. Samim potpisivanjem Sporazuma o stabilizaciji i pridruživanju iskazana je i politička volja za primjenu evropskih standarda, zbog čega i Vijeće ministara BiH treba, kroz prijedloge zakona i odluke koje će usvajati uključivati u pravni sistem Bosne i Hercegovine te standarde i ono što je propisano pravnom tečevinom Evropske unije. Kao primjeri evropskih standarda koji treba da budu primijenjeni na evropskom putu Bosne i Hercegovine navedeni su: očuvanje nezavisne pozicije regulatora, usvajanje Zakona o obligacionim odnosima, te rješavanje pitanja državne imovine.

Nakon izlaganja Šefika Džaferovića, korekciju citata (repliku) imao je Jerko Ivanković Lijanović.

Nakon što su govorili svi prijavljeni za diskusiju o ovoj tački dnevnog reda, predsjedavajući sjednicom Mladen Ivanić dao je riječ Nikoli Špiriću, kako bi mogao dati svoj komentar na vođenu raspravu.

Nikola Špirić je, u završnom izlaganju, dao je pojašnjenja i odgovore na pitanja Zlatka Lagumdžije i Halida Genjca.

U nastavku sjednice Mladen Ivanić konstatirao je da bi članovi Parlamentarne skupštine BiH trebalo da se dogovore o načinu završetka sjednice, te je upoznao prisutne s mišljenjem Zajedničkog kolegija oba doma Parlamentarne skupštine BiH da se svi zaključci podneseni na sjednici upute Zajedničkoj komisiji za evropske integracije na mišljenje, a da se o svakom zaključku domovi izjasne na prvoj narednoj sjednici.

O iznesenom prijedlogu diskutirali su: Zlatko Lagumdžija, Ivo Miro Jović, Denis Bećirović, Martin Raguž, Jerko Ivanković Lijanović, Azra Hadžiahmetović, Drago Kalabić, Milorad Živković i Mladen Ivanić.

Nakon iznesenih prijedloga o načinu završetka sjednice, Mladen Ivanić pozvao je domove da glasaju o prijedlogu zaključka Zajedničkog kolegija oba doma koji glasi:

**"Prijedlozi zaključaka, podneseni na 10. zajedničkoj sjednici oba doma Parlamentarne skupštine BiH, upućuju se, zajedno sa transkriptom rasprave, na mišljenje Zajedničkoj komisiji za evropske integracije Parlamentarne skupštine BiH, a domovi će se o njima, u skladu s poslovnica, odvojeno izjašnjavati na narednoj sjednici."**

**Zaključak je usvojen u oba doma Parlamentarne skupštine BiH, sa sljedećim rezultatima glasanja:**

**Predstavnički dom**

"za"	19	13 FBiH	6 RS
"protiv"	8		
"suzdržan"	2		

**Dom naroda**

"za"	7
"protiv"	1
"suzdržan"	1

Sjednica je završena u 16 sati.

Sastavni dio ovog zapisnika je transkript 10. Zajedničke sjednice oba doma Parlamentarne skupštine BiH.

Sekretar  
Doma naroda  
Marin Vukoja

Predsjedavajući  
Doma naroda  
dr. Mladen Ivanić